

„Төрски келн—умшлгъна дектр“

Халымг танъгъчин э к л ц школин негдгч класст умшл дектр „Төрски келн“ барас удан гарад ирдг болвчи,— манд—халымг багширт болн цуг халымг сургъульчирт ик байр болв. „Төрски келн“ дектриг хурадж диглдж гаргъснь Павла Дордж. Дектр йир саяхн гадрта, кесг олнзусн зургта: чир-утхарнь йир саянәр бичгддж. Тегад тер дектр йир дуртагъар умшгдна. Болв мана халәцд болхла, дектриг кесг барин эндүтәгъяр гаргъдж. Тегад, тернь бички сургъульчирт умшхднь йир ик боодг болад баянә.

Дектрин халхсиг зервк секад халәхлә, эндүтәгъяр барлгдсн үгмүд халхас халх болгънд темдгддж болхмн.

Тиим барин эндүс „Арифметика“ болн „Үзгл“ гидг дектрмүдт бас йир ик. „Арифметика“ дектрт баях зармзарм эсвсиг халымг келәр умшлж сургъульчир биш, ик кун меддж умшдж чадшго.

Тер тоот барин эндүг дарук барллгънд гаргълго, саянәр халәдж гаргъх кергтә. Манагъар болхла, орсас халымг келнд орчуллгъиг бас чигн оньгинь олдж, саянәр кехмн.

„Төрски келнд“ кесг шүл-

гүд барлгдсн баянә. Тер шүлгүдиг Халымг танъгъчин темдгтә, олнд нертә поэтнр Колян Сандж, Лееджнә Церн, Эрнджәнә Константин, Дорджин Баснъ, нань чигн улс бичдж.

Орсас орчулгдсн рассказмуд-дорхнь, халымгин бичачирин бичсн келвр болн шүлгүд сургъульчирт умшхд амр болдж гарна.

Шин сургъулин джилд мана сургъульчирт барас халымг келәр ямаран чигн дектр гаргъхларн, эндү угагъар барлдж гаргъхиг—эрки төр гидж ом наснь санх кергтә.

С. БАДМ-ГАРЯЕВ.